



## PERKASA, CHEST juara Debat Piala Naib Canselor

Pasukan debat Persatuan Kejuruteraan Awam & Sumber Alam (PERKASA), Universiti Malaysia Pahang (UMP) menjuarai pertandingan debat Kategori Bahasa Melayu manakala, bagi kategori Bahasa Inggeris diungguli Persatuan Mahasiswa Kejuruteraan Kimia & Sumber Asli (CHEST) dalam Pertandingan Debat merebut Piala Naib Canselor pada 4 Ogos 2010 yang lalu.

PERKASA membariskan pendebat yang terdiri daripada Mohamad Helmi Othman, Iqram Zulkifli dan Wan Mohd. Fakri selaku pihak pembangkang menewaskan barisan pihak pencadang yang terdiri daripada Persatuan Mahasiswa Sains & Teknologi Industri (Scitexs) dengan tajuk Dasar Baharu Ekonomi Semakin Suntut.

Pihak Pencadang terdiri daripada Siti Aisyah Mustapha, Wan Muhammad Muadz dan Qusyairi Hashim yang juga diistiharkan sebagai pendebat terbaik dalam pertandingan pada kali ini.

Sementara itu, pasukan Kategori bahasa Inggeris dianggotai Shamini Gunaseelan, Winson Sia Shen Loong dan Chitra Charan Suri menjuarai pertandingan setelah menewaskan Kelab

Orator UMP yang terdiri daripada Renu Sekaran, Latisha Anthony dan Xian Fu.

Pemenang tempat pertama menerima Piala Pusingan Debat Piala Naib Canselor, wang tunai RM 500, cenderahati dan sijil penghargaan. Hadiah disampaikan oleh Naib Canselor UMP, Profesor Dato' Dr. Daing Nasir Ibrahim.

Dalam ucapan perasmian penutup, Profesor Dato' Dr. Daing menasihatkan mahasiswa agar sentiasa mengasah, mempertajam minda dan daya fikir melalui keterampilan watak, personaliti serta pendekatan.

"Pendebaran perlu dilihat dari perspektif yang positif, bukan menjadi medan untuk mencari salah, merendahkan dan mengibaratkan kewibawaan atau menabur fitnah.

Pendebaran berkualiti perlu mempunyai hujah yang bernas, konstruktif dan berdiplomasi merupakan prasyarat membentuk pemimpin berkarakter," katanya.

Menurut Profesor Dato' Dr. Daing Nasir, Kelab Orator UMP perlu terus menganjurkan program ilmiah, antaranya wacana, forum, kupasan buku dan lain-lain yang mencerminkan ketinggian nilai

ilmu pengetahuan.

Sementara itu, Presiden Kelab Orator UMP yang juga merupakan Pengarah Pertandingan Debat Piala Naib Canselor, Mohd. Adam Salam berkata, pertandingan kali ketujuh ini menghimpunkan seramai 174 peserta mewakili 44 pasukan daripada kelab dan fakulti yang bertanding bagi merebut piala pertandingan ini.

"Pertandingan ini dapat mengasah kemahiran berkomunikasi golongan mahasiswa dan mencungkil bakat baharu," katanya.

Pendebat terbaik, Qusyairi Hashim berkata mereka berlatih dan mencari maklumat secara bersama melalui akhbar, internet, majalah dan sentiasa membuat perbincangan serta strategi bagi memastikan hujah yang disampaikan bernas.

Hadir menyaksikan pertandingan Timbalan Naib Canselor (Penyelidikan & Inovasi), Profesor Dato' Rosli Mohd. Yunus, Timbalan Naib Canselor (Akademik & Antarabangsa), Profesor Dr. Badhrulhisham Abdul Aziz, Penolong Naib Canselor (Hal Ehwal Pelajar & Alumni), Profesor Dr. Yuserrie Zainuddin.

